



Մ Ա Յ Ր Ա Թ Ո Ռ Ո Ւ Մ

Ապրիլի 2-ին, հինգշաբթի, հոգեշնորհ Տ. Ներսես վարդապետ Պողապալյանը մեկնեց Մոսկվա, ապրիլի 7-ին, Ծաղկազարդի առթիվ, պատարագելու և Բանին կենաց քարոզությամբ մխիթարելու Մոսկվայի հայ հավատացյալներին:

* * *

Ապրիլի 7-ին, կիրակի, Ծաղկազարդ: Մայր Տաճարում պատարագեց և քարոզեց Հոգևոր Ճեմարանի վերատեսուչ գերաշնորհ Տ. Հայկազուն արքեպիսկոպոս Աբրահամյանը: Քարոզի բնաբանն էր «Ողորմեաց մեզ, Որդի Դավթի»:

Սուրբ պատարագին ներկա էր Վեհափառ Հայրապետը:

Երեկոյան ժամը 5-ին Մայր Տաճարում, Վեհափառ Հայրապետի հանդիսադրությամբ, տեղի ունեցավ «Դոնբասցէք»-ի հանդիսավոր արարողությունը:

* * *

Ապրիլի 11-ին, Ավագ հինգշաբթի, «Յիշատակ ընթրեաց Տեառն մերոյ Յիսուսի Քրիստոսի»: Մայր Տաճարում պատարագեց հոգեշնորհ Տ. Մուշեղ վարդապետ Պետիկյանը:

* * *

Ապրիլի 13-ին, Ավագ շաբաթ, «Ծրագալոյց Զատիկ»: Երեկոյան ժամերգության ընթացքում Հոգևոր Ճեմարանի ուսանողները ընթերցեցին Դանիելի գիրքը: Այնուհետև Մայր Տաճարում ծրագալույցի հանդիսավոր սուրբ պատարագը մատուցեց գերաշնորհ Տ. Ասողիկ եպիսկոպոս Ղազարյանը:

Սուրբ պատարագին ներկա էր Վեհափառ Հայրապետը:

* * *

Ապրիլի 14-ին, կիրակի, «Զատիկ, յարութին Տեառն մերոյ Յիսուսի Քրիստոսի»: Ստեփանավանի Ս. Աստվածածին եկեղեցում պատարագեց և քարոզեց հոգեշնորհ Տ. Գրի-

գոր վարդապետ Եղիայանը, որը Մայր Աթոռից մեկնել էր այնտեղ պատարագելու և Բանին կենաց քարոզությամբ մխիթարելու հավատացյալներին:

* * *

Ապրիլի 15-ին, երկուշաբթի, «Յիշատակ մեռելոց»: Մայր Տաճարում պատարագեց հոգեշնորհ Տ. Ներսես վարդապետ Պողապալյանը:

Հավարտ սուրբ պատարագի, հոգեհանգրստյան պաշտոն կատարվեց «Վասն համայն ննջեցելոց ազգիս Հայոց»:

* * *

Ապրիլի 21-ին, «Նոր կիրակի», Մայր Տաճարում պատարագեց և քարոզեց հոգեշնորհ Տ. Գրիգոր վարդապետ Եղիայանը «Տօնեսցուք ցնծութեամբ զնաւակատիս հոգւոց մերոց, նորոգեալ ի հնութենէ մեղաց» բնաբանով:

Սուրբ պատարագին ներկա էր Վեհափառ Հայրապետը:

* * *

Ապրիլի 23-ին, երկուշաբթի, Վեհափառ Հայրապետի բարձր կարգադրությամբ, Մայր Աթոռի միաբան բարեշնորհ Զոհրապ սարկավագ Շամլյանը, հաջողությամբ ավարտելով Հոգևոր Ճեմարանի լսարանական բաժինը 1961—1962 ուսումնական տարում, մեկնեց Բեյրութ, շարունակելու իր ուսումը Անգլիայում:

* * *

Ապրիլի 27-ին, ուրբաթ, Վեհափառ Հայրապետի նախագահությամբ, երեկոյան ժամը 6-ին, Վեհարանում տեղի ունեցավ Գերագույն Հոգևոր Խորհրդի նիստը:

* * *

Ապրիլի 29-ին, կիրակի, Մայր Տաճարում պատարագեց արժանապատիվ Տ. Մկրտիչ ավագ քահանա Մկրտչյանը:

